

ADMINISTRACIÓN LOCAL

MUNICIPAL

VEDRA

Secretaría-Intervención

Aprobación definitiva da modificación do Regulamento municipal para a concesión de condecoracións, honores e distincións do Concello de Vedra

ANUNCIO

Aprobación definitiva da modificación do Regulamento municipal para a concesión de condecoracións, honores e distincións do Concello de Vedra (Expediente 2025/G014/000001)

Ao non terse presentado alegacións durante o período de exposición ao público, queda automaticamente elevado a definitivo o acordo adoptado polo Pleno do concello en sesión ordinaria celebrada o 30.04.2025, de aprobación inicial da modificación do Regulamento municipal para a concesión de condecoracións, honores e distincións do Concello de Vedra (Expediente 2025/G014/000001).

De conformidade co disposto no artigo 70.2 da lei 7/1985, de 2 de abril, Reguladora das bases do réxime local, faise público o texto íntegro do mesmo coas modificacións aprobadas:

REGULAMENTO MUNICIPAL PARA A CONCESIÓN DE CONDECORACIÓNS, HONORES E DISNTINCIONES

O Concello de Vedra, no desexo de manifestar de maneira notoria a súa gratitude e recoñecemento polos servizos extraordinarios, traballos destacados no aspecto cultural, científico, artístico, deportivo, profesional, social etc. prestados ao municipio por españois ou estranxeiros, tanto individual como colectivamente, vén a establecer o Regulamento a tal efecto para conceder as distincións, das que as características, clases e variantes, se regulan no mesmo e que son conforme a:

CAPÍTULO I.- DOS HONORES DO CONCELLO.

Artigo 1º.-

A.- Os títulos, honores, distincións e condecoracións que con carácter oficial, conforme ao previsto no Regulamento de Organización, Funcionamento e Réxime Xurídico das Entidades locais, art. 189, 190 e 191, que poderá conferir o Concello de Vedra para premiar especiais merecementos, destacados méritos ou relevantes servizos persoais ou colectivos en favor do municipio, son os seguintes:

- 1.-Título de hóspede distinguido.
- 2.- Título de fillo predilecto de Vedra.
- 3.- Título de fillo adoptivo de Vedra.
- 4.- Nomeamento de Alcalde ou Concelleiro honorario.
- 5.- Medalla de honor de Vedra.
- 6.- Medalla de Vedra nas categorías de ouro, prata e bronce

B.- Outras distincións honoríficas: o Pleno da Corporación poderá designar unha vía pública, instalación ou edificio municipal co nome dunha persoa ou entidade vencellada ao municipio, recoñecendo con iso especiais merecementos ou servizos extraordinarios

C.- As distincións sinaladas no artigo anterior son meramente honoríficas, sen que poidan outorgar ningún dereito económico nin administrativo.

Artigo 2º.-

A concesión das distincións honoríficas expresadas deberá ir precedida do cumprimento das normas establecidas no presente regulamento.

CAPÍTULO II.- DOS TÍTULOS DE FILLO PREDILECTO E DE FILLO ADOPTIVO.

Artigo 3º.-

1.- A concesión do título de fillo predilecto de Vedra só poderá recaer en quen, tendo nacido no concello, destacara de forma extraordinaria por calidades ou méritos prestados en beneficio ou honor de Vedra que alcanzaran consideración indiscutible no concepto público.

2.- A concesión do título de fillo adoptivo de Vedra poderá outorgarse ás persoas que, sen ter nacido neste concello, reúnan as circunstancias sinaladas no parágrafo anterior.

3.- Tanto o título de fillo predilecto como o de fillo adoptivo poderán ser concedidos a título póstumo, sempre que no falecido concorreran os merecementos antes mencionados.

Artigo 4º.-

1.- Os títulos de fillo predilecto e adoptivo, ambos de igual rango, constitúen a maior distinción do concello, polo que a súa concesión farase sempre utilizando criterios moi restritivos.

2.- Os títulos anteriores terán carácter vitalicio e, unha vez outorgados dous para cada un deles, non poderán conferirse outros mentres vivan as persoas favorecidas, a menos que se trate dun caso moi excepcional, a xuízo da corporación que haberá de aclarar esa excepcionalidade previamente en sesión plenaria e por maioría de tres cuartos.

Artigo 5º

1.- A concesión dos títulos de fillo predilecto e de fillo adoptivo será acordada pola Corporación Municipal, co voto favorable de dous terzos dos concelleiros, a proposta do Alcalde e previo expediente no que deberán quedar acreditados os merecementos que xustifiquen estes honores.

2.- Acordada a concesión de calquera dos dous anteriores, a Corporación Municipal, sinalará a data na que se reunirá para facer entrega á persoa designada en sesión solemne do diploma e das insignias que acrediten a distinción.

3.- O expresado diploma deberá estenderse nun deseño artístico e conterá de maneira moi sucinta os merecementos que xustifican a concesión. A insignia axustarase ao modelo que no seu día aprobe a corporación, no que deberá figurar, en todo caso, o escudo do concello, así como a inscrición de fillo predilecto ou adoptivo segundo proceda.

Artigo 6º.-

As persoas ás que se lles concedan os títulos de fillo predilecto ou fillo adoptivo do municipio terán dereito a acompañar á Corporación Municipal nos actos ou solemnidades ás que esta concorra, ocupando o lugar que para iso lle estea sinalado. A tal efecto, o Alcalde dirixirá ás persoas interesadas unha comunicación oficial, na que se lle comunique o lugar, data e hora da celebración do acto ou solemnidade e participándolles a invitación a asistir.

CAPÍTULO III.- DO NOMEAMENTO DE MEMBROS HONORARIOS DO CONCELLO.

Artigo 7º.-

1.- O nomeamento do Alcalde ou Concelleiro honorario do Concello de Vedra poderá ser outorgado por este a personalidades españolas ou estranxeiras, xa como mostra da alta consideración que lle merecen, xa como correspondencia a distincións análogas das que teñan sido obxecto a Corporación ou autoridades municipais.

2.- Non poderán outorgarse novos nomeamentos dos expresados no número anterior, mentres vivan dúas persoas que sexan Alcaldes honorarios ou cinco que teñan recibido o título de Concelleiro honorario.

Artigo 8º.-

1.- A concesión destes títulos honoríficos será acordada pola Corporación Municipal co voto favorable de dous terzos dos concelleiros, a proposta razoada do Alcalde. Poderá facerse con carácter vitalicio ou por prazo limitado, polo período que corresponda o cargo de que se trate.

2.- Acordada a concesión destas distincións, procederase na forma que dispón o número 2 do artigo 5º para a entrega ao agraciado do diploma e insignias que, neste caso, consistirán nunha medalla idéntica á que poidan usar o Alcalde ou os Concelleiros, segundo o caso.

Artigo 9º.-

1.- As persoas a quen se lles concedan estes nomeamentos non terán ningunha facultade para intervir no goberno nin administración municipal, se ben o Alcalde poderá encomendarlles funcións representativas cando teñan que exercerse fóra do termo municipal.

2.- Nos demais actos oficiais que celebre o concello, ocuparán o lugar preferente que a Corporación Municipal lles sinale e asistirán a eles ostentando a medalla acreditativa do honor recibido.

CAPÍTULO IV.- TÍTULO DE HÓSPEDE DISTINGUIDO.

Tal como se vén facendo noutros concellos, a Alcaldía poderá conceder por Decreto o Título de Hóspede distinguido do Concello a aquelas personalidades que visiten o municipio e que dalgunha maneira se estime de interese facelo, entregándolles o correspondente diploma acreditativo.

CAPÍTULO V.- DA MEDALLA DE VEDRA.**Artigo 10º.-**

1.- A medalla de Vedra é unha recompensa municipal creada para premiar méritos extraordinarios que concorran en personalidades, entidades ou corporacións, tanto nacionais como estranxeiras, por ter prestado servizos ao municipio ou dispensado honores a el.

2.- A medalla terá o carácter de condecoración no seu grao máis elevado de medalla de honor e de medalla de ouro, prata ou bronce.

Artigo 11º.-

1º.- A medalla de honor, que só se poderá outorgar a El-Rei, Presidente do Goberno, da Xunta ou Ministros, consistirá nunha medalla de ouro e brillantes co escudo municipal, no anverso e no reverso, no borde superior a inscrición referida ao grao de nomeamento, no centro “Concello de Vedra” e no borde inferior o nome da persoa beneficiaria. Terá forma ovalada de 45 mm de altura e 35 mm de anchura, con argola e asa e irá pendente dunha cinta de seda de cor verde igual ao do escudo heráldico municipal. As medallas de ouro, prata e bronce serán acuñadas no correspondente metal e co mesmo deseño que a de honor.

Cando se trate dalgunha entidade ou corporación, a cinta será substituída por unha gravata da mesma cor, para que poida ser enlazada á bandeira ou insignia que deba ostentala.

A medalla miniatura ou distintivo de solapa será idéntica á medalla, salvo nas súas dimensións, que son de 18 mm de altura e 14 mm de anchura, con cinta e pasador argola.

2º.- Para determinar en cada caso a procedencia da concesión e a categoría da medalla a outorgar, deberase ter en conta a índole dos méritos e servizos, a transcendencia do labor realizado en beneficio e honor do Concello e as particulares circunstancias da persoa proposta para a condecoración, prevalecendo sempre a calidade dos merecementos sobre o número dos mesmos.

Artigo 12.-

1.- O acordo de concesión da medalla de honor será adoptado pola maioría de dous terzos dos concelleiros e aquela caducará co pasamento do agraciado, deixando libre a posibilidade de conceder outra.

2.- A concesión das demais medallas será de competencia do Pleno, requiríndose para a súa concesión a maioría de dous terzos dos concelleiros que concorran á sesión.

3.- Cando a concesión de medallas de ouro, prata e bronce se fagan en favor do persoal funcionario municipal, serán de aplicación, ademais das normas establecidas neste regulamento, as contidas na lexislación vixente sobre o persoal funcionario da Administración Local.

Artigo 13.-

1.- As condecoracións outorgadas serán obxecto dun acto solemne de entrega dos correspondentes diplomas, distintivos e medalla de lapela, na forma que o Concello dispoña.

2.- O diploma será estendido en deseño artístico.

CAPÍTULO VI.- DO PROCEDEMENTO DE CONCESIÓN DE HONORES.**Artigo 14.-**

1.- A concesión de calquera dos honores a que se refire este regulamento requirirá a instrución previa do oportuno expediente, que serva para determinar os méritos ou circunstancias que aconsellen aquela concesión.

2.- Cando se trate de conceder honores a personalidades estranxeiras e as esixencias de tempo así o aconsellen, o expediente poderá ser substituído por un escrito razoado do Alcalde, dirixido ao concello Pleno, para que poida facultar previamente a fin de que en nome da Corporación, poida conferir a distinción ou distincións que xulgue adecuadas, dando conta a aquela na primeira sesión plenaria que se celebre.

Cando as distincións se concedan a personalidades estranxeiras, requirirase a autorización expresa do Ministerio para as Administracións Públicas, previo informe do Ministerio de Exteriores, de acordo co art. 190 do ROF.

3.- O inicio do procedemento farase por decreto do Alcalde-Presidente, ben por propia iniciativa ou a requirimento dunha terceira parte dos membros que integran a Corporación Municipal ou con motivo da petición razoada dun organismo oficial ou de entidade ou asociación de recoñecida solvencia. Cando a proposta se refira a persoal funcionario municipal, estarase ao disposto no número 3 do artigo 12.

4.- No Decreto de Alcaldía designarase de entre os concelleiros/as unha persoa instrutora, que se ocupará da tramitación do expediente.

Artigo 15.-

1.- A persoa instrutora practicará cantas dilixencias estime necesarias para investigar os méritos da persoa proposta, solicitando informes e recibindo declaración de cantas persoas ou representantes de entidades poidan subministrar datos, antecedentes ou referencias que conduzan ao esclarecemento daqueles.

2.- Terminada a práctica de cantas dilixencias foran acordadas, a persoa instrutora formulará a proposta motivada, que elevará á comisión correspondente do Concello, para que esta, co seu ditame, a remita á Alcaldía-Presidencia.

3.- O Alcalde-Presidente, á vista do ditame da comisión, poderá acordar a ampliación das dilixencias ou aceptar plenamente o ditame, e en calquera caso acometer por escrito razoado ao Pleno do Concello o expediente para que acorde a resolución que estime procedente, na forma que se dispón neste regulamento.

Artigo 16.-

1.- Un extracto dos acordos da corporación outorgando calquera dos honores citados deberá inscribirse nun libro rexistro, que estará a cargo do titula da Secretaría do Concello. O libro rexistro estará dividido en cinco seccións, unha para cada unha das recompensas honoríficas reguladas neste regulamento.

2.- En cada unha das seccións anteriores inscribíranse por orde cronolóxica de concesión, os nomes e circunstancias persoais de cada un das persoas favorecidas, a relación de méritos que motivaron a concesión, a data desta e no seu caso, a do pasamento.

3.- O Concello poderá privar das distincións que son obxecto deste regulamento, coa conseguinte cancelación do asento no libro rexistro, calquera que sexa a data en que foran conferidas, a quen incorra en faltas que aconsellen esta medida extrema. O acordo da corporación no que se adopte esta medida irá precedido da proposta e informe reservado da Alcaldía e requirirá o mesmo número de votos que fose preciso para outorgar a distinción de que se trate.

Artigo 17.-

Os honores que a Corporación poida outorgar a El-Rei non requirirán outro procedemento que a previa consulta á Casa de Su Majestad, e en ningún caso se incluírán no cómputo numérico que como limitación establece o presente regulamento.

Disposición final.-

O presente regulamento, que consta de dezasete artigos e unha disposición final, entrará en vigor, unha vez aprobado definitivamente polo Concello e publicado o seu texto integramente no Boletín Oficial da Provincia, transcorrido o prazo previsto no artigo 65.2 da Lei 7/1985, do 2 de abril,

Vedra, 24 de xuño de 2025

O Alcalde

Asdo. Carlos Martínez Carrillo

2025/4184